



Cuira, ils 16 d'avust 2022

Communicaziun a las medias

Flo e Valentina – Uss hai dà las dudesch!

Nov cudesch da lectura da la Lia Rumantscha per uffants

La Lia Rumantscha sa legra da preschentar in nov cudesch per lecturas e lecturs giuvens: «Flo e Valentina – Uss hai dà las dudesch!» raquinta d'ina amicizia nunusitada tranter il mattet Flo e la mattetta-vampir Valentina. L'istorgia che procura per bleras risadas, ma forse era per in zichel pel-giaglina, pon ins retrair en tut ils idioms ed en rumantsch grischun.

Amez la notg sa sveglia Flo andetgamain. Davant el stat ina mattetta e dumonda per in dent da latg. Tge? Ella vul in dent dad el? È quai forse la diala da dents? Ma cun sia mantella e la pel pallida vesa ella plitost ora sco in ... Uss hai dà las dudesch – sco in vampir! I sa mussa che la mattetta-vampir Valentina dovra urgentamain da Flo ses dent che ballucca. Malgrà ch'ella ha gia pli che 100 onns, n'èn ses dents anc betg gizz avunda per ir sin il bal da vampirs. Be Flo po gidar ella ...

Punctualmain per il cumenzament dal nov onn da scola edescha la Lia Rumantscha in roman curt plain fantasia per lecturas e lecturs a partir dad otg onns. «Flo e Valentina – Uss hai dà las dudesch!» raquinta d'ina amicizia nunusitada, da frars gronds che seccan e da la preferenza per tschigulatta da nugat. Las aventuras da Flo e Valentina procuran per bleras risadas en las chombras d'uffants e tranteren forse era per in zic pel-giaglina. La Lia Rumantscha ha translata il cudesch da l'autura tudestga Lena Hach en tut ils idioms ed en rumantsch grischun ed edescha el pia en sis variantas. Ils chapitels curts e las illustraziuns en alv e nair da Tine Schulz gidan a cumprender l'istorgia divertenta.

«Flo e Valentina – Uss hai dà las dudesch!» fa part dal program per famiglias *kidsfits* da la Lia Rumantscha che gida a promover la lingua rumantscha tar uffants.

Il cudesch tastgabel «Flo e Valentina – Uss hai dà las dudesch!» cumpara en tut ils idioms ed en rumantsch grischun e custa CHF 14.50. El po vegnir retratg a partir d'immediat sin www.liarumantscha.ch, via telefon 081 258 32 22 u en las librerias.